



1. Thusang!




2. Ebe Palesa o kae?



3. Sehwete se seholo



4. Ke mang ya thubileng fensetere?



★★★ Buka 2B

Dikahare

1. Thusang!	1
2. Ebe Palesa o kae?	11
3. Sehwete se seholo	21
4. Ke mang ya thubileng fensetere?	31

 Tlhaahlamano ya dibuka tsa ho bala tsa Mophato wa Motheo

Diphatlaladitswe ka 2016 ke Molteno Institute for Language and Literacy

Ditshehedsitswe ka ditjhelete ke Zenex Foundation



Mophato 3 ★★ Buka 2B

- Mohlophisi wa tlhaahlamano ya dibuka: **Jenny Katz**
- Bohlahi ba pale: **Mirna Lawrence** le **Jenny Katz**
- Setsebi sa puo ya Sesotho: **Mmasibidi Setaka**
- Bahlophisi ba Sesotho: **Virginia Khumalo (VK)** le **Matshediso Mokoena**
- Batshwantsho: **Marleen Visser** - 1. Thusang!
 Shayle Bester - 2. Ebe Palesa o kae?, 4. Ke mang ya thubileng fensetere?
 Sandy Lightley - 3. Sehwete se seholo
- Boalo le boqapi: **Resolution** le **ihwhiteDesign**



Creative Commons
Attribution-
NonCommercial-
NoDerivatives
(CC BY-NC-ND) 4.0
International Licence

Disclaimer: You are free
to download and share
this work as long as you
attribute the Molteno
Institute for Language
and Literacy, but you
may not change this
work in any way or
use it commercially.


© 2016 Molteno Institute for Language and Literacy

Website: www.vulabula.co.za

ISBN 978-1-77580-562-5



1. Thusang!




PELE O BALA PALE ENA


Netefatsa hore o utlwisia seo mantswe ana a se bolelang:
sehlaha, shebahala, hlwella, thibaneng, theoha, ngaotsa,
tshwasehile, molebe

Netefatsa hore o tseba ho bala mantswe ana:
hlwelletse, tshwareha, itshwareleditse, tshwasehile, tshwenyehe

Ka tsatsi le leng
katse e tenya e
ne e tsamaya
mmileng ha e tla
utlwa modumo o
bonolo o molodi.
Ya sheba hodimo
ya bona nonyana
e nyane sehlaheng,
hodimo sefateng
se setelele.



'Hmmm,' ho
nahana katse e tenya. 'Nonyana yane e nyane e
shebahala e le monate. Ke nahana hore ke tla e ja
bakeng sa dijo tsa motsheare.'




Katse e tenya ya
sebedisa manala
a yona a matelele,
a bohale, ho e
thusa ho hlwella
sefateng se
setelele. Ya ya
hodimo, ya hlwella
hodimo-dimo.

Katse eo e thibaneng! E hlwelletse hodimo haholo yaba e tshwareha hodima sefate. Katse e tenya e ne e tshohile. E ne e sa tsebe hore e tla theoha jwang.

‘Meaw, meaw! Thusang!’ ya ngaotsa haholo.

Ka nako eo Mimi o ne a feta. A utlwa katse e tenya e ngaotsa. A sheba hodimo mme a e bona lekaleng le hodimo-dimo la sefate.

‘Se kgathatsehe, katse e tenya,’ ho bua Mimi. ‘Ke tla o pholosa.’




Mimi a hlwella sefateng, a itshwareleditse ka thata makaleng. Yaba o sheba fatshe. Ho ne ho shebahala ho le hole haholo fatshe. Mimi o ne a tshohile ho ba hodimo hakalo sefateng.

'Thusang! Thusang! Ke batla ho theoha!' a hoeletsa.

Ka nako eo ha feta Pakiso. A utlwa Mimi a hoeleditse. A sheba hodimo a bona Mimi le katse e tenya ba tshwasehile sefateng.

'Le se kgathatsehe,' ho bua Pakiso. 'Ke tla le pholosa.'




Pakiso a hlwella sefateng, a itshwareleditse ka thata makaleng a sefate. Empa a hlwella makaleng a fosahetseng a sefate yaba o a tshwaseha. Pakiso o ne a le hodimo haholo sefateng hore a ka tlolela fatshe, yaba o qala ho tshoha.

‘Thusang! Thusang! Ke kopa le re thuseng ho theohela fatshel!’ a hoeletsa.

Ka nako eo ausi Rina a feta. A utlwa Pakiso a hoeleditse. A sheba hodimo a bona Pakiso, Mimi le katse e tenya ba tshwasehile sefateng.

‘Le se kgathatsehe,’ ho bua ausi Rina. ‘Ke tla le pholosa.’




Ausi Rina a hlwella sefateng, a itshwareleditse ka thata makaleng a sefate. Empa a thella a tshwaseha pakeng tsa makala a mabedi. Ausi Rina o ne a le hodimo haholo hore a ka tlolela fatshe. O ne a tshohile.

‘Thusang! Thusang! Ke kopa le re thuseng ho theohela fatshe!’ a hoeletsa.

Ka nako eo ha feta malome Soli. A utlwa ausi Rina a hoeleditse. A sheba hodimo a bona bohle ba tshwasehile sefateng. Ebe malome Soli le yena o tla leka ho hlwella sefateng?

Tjhe! Malome Soli a kgutla a itsamaela. Hobaneng a sa ba thusa? Hobaneng a ba siya sefateng?


‘Re tshwasehile molebe mona!’ baa lla.



Butle! Malome Soli o kgutlile! O kgutlile a tshwere lere e telele!

'Se tshwenyehe, Mimi. Se tshwenyehe, Pakiso. Se tshwenyehe, ausi Rina,' ho bua malome Soli. 'Ke tla le thusa. Le ka theoha ka lere kaofela.'

Malome Soli ya bohlale!



Ausi Rina a theoha pele. Pakiso a latela. Mimi a theoha qetellong.

‘Re a leboha, malome Soli! O re pholositse!’ ba bua ba thabile.

Empa ho tla etsahalang ka katse e tenya? Kamora ho baka mathata, katse e tenya ya tlolela fatshe ho tswa sefateng ka boyona. E ne e sa hloke thuso hohang!



2B-1 Thusang!

A. Tekokutlwisiso

Araba dipotso ka dipolelo tse felletseng.

1. Hobaneng ha katse e tenya e ile ya hlwella hodimo sefateng?
2. Ke hobaneng ha Mimi a ile a hlwella hodimo sefateng?
3. Ausi Rina o tsebile jwang hore bana ba hloka thuso?
4. Ho etsahetse eng ka Ausi Rina?
 - a) O ile a hlwella hodimo sefateng.
 - b) O ile a thella a tshwaseha makaleng a sefate.
 - c) O ile a wa ho tswa sefateng.
5. Bohle ba ile ba ikutlwa jwang ha malome Soli a tsamaya? Hobaneng?
6. Malome Soli o ba thusitse jwang?
 - a) O ile a hlwella sefateng.
 - b) O ile a tsamaya.
 - c) O tlile le lere.
7. Ke mang ya neng a sa hloke thuso ho theoha sefateng? Hobaneng?
8. Tshwaya ka (X) thoko ho karabo e nepahetseng. Malome Soli _____.

a) O bile bohlale	
b) O hlwelletse difate	
c) O bile le katse lapeng	

B. Tshebediso ya puo

DBE Sehlopha 3 Buka 1: mq. 2I, 72
DBE Sehlopha 3 Buka 2: Iq. 2I

Ngololla dipolelo tse latelang. Kenya matshwao a puo a siilweng.

1. nthuseng hle ho lla Mimi
2. mimi pakiso le ausi rina ba ne ba tshwasehile sefateng
3. hobaneng ha malome Soli a ile a tsamaya


C. Ngodiso

DBE Sehlopha 3 Buka 1: mq. 54, 66-68, 100-102, 134-136
DBE Sehlopha 3 Buka 2: mq. 67-69, 98-100

Kgetha se seng sa dihloho tse latelang. Ngola **pale** ya bonyane mela e 10. Efa pale ya hao sehloho.

1. Na o kile wa tshwaseha? Ho ne ho etsahetse eng?
O thusitswe ke mang?
KAPA
2. O kile wa thusa motho a tshwasehile? Ho ne ho etsahetse eng?
KAPA
3. Iqapele ya hao pale ka ho tshwaseha ha emong kae kae.

2. Ebe Palesa o kae?



PELE O BALA PALE ENA

Netefatsa hore o utlwisa seo mantswe ana a se bolelang:
mokgoro, phodileng, lebopong, fatshe, lehlabatheng, setala, hela,
dipalesa, lempetje, dila, seretse, mokgodutswane

Netefatsa hore o tseba ho bala mantswe ana:
motjha, tjhesa, senqanqane, lempetje, mokgodutswane

Lelapa la Palesa le aha mokgoro o motjha. Le hoja esale hoseng, ba se ba tjha ebile ba nyorilwe mosebetsing oo wa bona. Ba hloka metsi.

Palesa o ile tlase nokeng. O tla tlisetsa bohle metsi a phodileng hore ba nwe.


Palesa a bona majwe a matle lebopong la noka. A beha nkgo ya hae fatshe a qala ho etsa dipaterone ka majwe lehlabatheng. A dumedisa senqanqane se setala se dutseng lefikeng le haufi.

‘Dumela, senqanqane. Lebitso la ka ke Palesa. Ho a tjhesa kajeno mme lelapa leso le sebetsa ka thata ho aha mokgoro o motjha. Ba nyorilwe ke ho sebetsa letsatsing. Ke tlile ho kga metsi a phodileng, a noka hore ba nwe... hang ha ke qetile ka dipaterone tsaka.’




Ha Palesa a ntse a bua le senqanqane le ho etsa dipaterone lebopong la noka, ba lelapa labo ba aha mokgoro o motjha. Ausi wa hae le abuti ba hela jwang ba marulelo. Baa tjhesa, ba kgathetse, ebole ba nyorilwe. Ba batla metsi a ho nwa. Fela Palesa ha a so kgutle ka nkgo ya metsi.

‘Ebe Palesa o kae?’ baa botsana.



Palesa o tla a tsamaya butle, a ipinela. Tseleng a bona dipalesa tse ntle. A beha nkgo fatshe a kgumama ho kga tse ding. A dumedisa lempetje lekaleng le haufi.

'Dumela, lempetje. Lebitso la ka ke Palesa. Bona, ke na le nkgo. Ke kgelletse lelapa leso metsi a phodileng a noka. Ba nkemetse. Ke tla tsamaya hang ha ke qetile ho kga dipalesa tsena.'



Ha Palesa a ntse a bua le lempetje le ho kga dipalesa, lelapa labo le aha mokgoro o motjha. Mme wa hae le nkgono ba dila seretse maboteng. Baa tjhesa, ba kgathetse, ebole ba nyorilwe. Ba batla metsi a ho nwa. Empa Palesa ha a so kgutle ka nkgo ya metsi.

‘Ebe Palesa o kae?’ baa botsana.



Palesa a dula fatshe jwanng bo bonolo, moriting wa sefate. A dumedisa mokgodutswane lekaleng le haufi.

'Dumela, mokgodutswane. Lebitso la ka ke Palesa. Bona, ke na le nkgo ya metsi. Ke tshwanelo ho isetsa lelapa leso metsi a phodileng a noka. Ba nkemetse. Ke tla tsamaya hang ha ke se ke phomotse.'



Ha Palesa a ntse a bua le mokgodutswane, a bile a phomotse tlasa moriti, lelapa labo le aha mokgoro o motjha. Ntate wa hae le malome ba a rulela. Ba tjhesa haholo, ba kgathetse ebile ba nyorilwe. Ba batla metsi a ho nwa. E se e le nako e telele Palesa a ile nokeng.

‘Ebe Palesa o kae?’ baa botsana.



Ke eo! Qetellong Palesa o kgutlile le nkgo ya metsi
a phodileng a noka!


Lelapa labo le thabetse ho mmona.

‘Hobaneng o diehile?’ baa botsa. ‘Re nyorilwe haholo!’

Palesa a beha nkgo fatshe a hemela tlase.

‘Tjhe, e bile tsela e telele! Ke kahoo ke bileng morao
nakong! Ho ne ho tjhesa haholo, le nkgo e le boima
haholo! Ke ile ka lokela ho sebetsa ka thata haholo
ha ke a ba le motsotso wa ho ema le ho phomola
hohang!’

Naa ho jwalo, Palesa? E kaba e ke nnete?



2B-2 Ebe Palesa o kae?

A. Tekokutlwisiso

Araba dipotso ka dipolelo tse felletseng.

1. Pale ena e etsahala _____.
 - a) haufi le noka
 - b) hara toropo
 - c) haufi le lewatle
2. Ebe Palesa one a ronngwe ho etsa eng?
3. Ke hobaneng ha bohle ba nyorilwe?
4. Palesa o kopane le diphofolo dife tseleng?
 - a) senqanqane, sekgo le lempetje
 - b) noha, mokgodutswane le senqanqane
 - c) lempetje, senqanqane le mokgodutswane
5. Palesa o rwetse metsi jwang?
6. Tshwaya dipolelo ho tloha ho I-3 ho ya ka tatelano ya diketsahalo tsa pale.

a) Palesa o ile a phomola moriting.	
b) Palesa o ne a kga dipalesa.	
c) Palesa o entse mekgabiso ka majwe lehlabatheng.	
7. Ekaba Palesa one aatile ho isa metsi hae? Hobaneng o rialo?
8. Ebe Palesa o boleletse ba lelapa la habo nnete?
 - a) Ee. Hobane o sebeditse ka thata ho tla le metsi.

- b) Tjhe, hobane o ne a bapala a bile a senya nako tseleng ya ho ya hae.
- c) Tjhe , hobane one a iphumana ale molato ha a nkile nako e kaalo .
- d) b le c

B. Tshebediso ya puo

DBE Sehlopha 3 Buka 1: mq 114, 118, 121
 DBE Sehlopha 3 Buka 2: mq 28, 76, 87, 104, 123

Fumana mabitso, leetsi le lekgethi ho enngwe le enngwe ya dipolelo tse latelang.

1. Senqanqane se setala se dutse lejweng.
2. Lelapa la bo Palesa le aha mokgoro o motjha.
3. Palesa o kga dipalesa tse ntle.

C. Ngodiso


Motho emong le emong wa lelapa one a ena le mosebetsi ho thusa ho aha mokgoro?

Tlatsa lenane la mesebetsi ya lelapa:

Mang?	O entse eng?	Leqephe patlisiso
Palesa	O ile ho lata metsi	12
Ausi wa Palesa le abuti		13
Mme wa Palesa le Nkgono		15
Ntate wa Palesa le Malome		17

3. Sehwete se seholo

*E thehilwe paleng ya Serashea (seRussia)
ya 'Moroho wa rapo o moholohadi'*



PELE O BALA PALE ENA


Netefatsa hore o utlwisia seo mantswe ana a se bolelang:
rapolasi, motlotlo, makgethe, sootho, hlaola, mora, kguwa,
hanelletse, otlolohile, ntsha mesifa, qabolang

Netefatsa hore o tseba ho bala mantswe ana:
dihwete, sootho, itshwarellsetse, itlhotlhora

Rapolasi Sepamo o ne a le motlotlo ka tshimo ya hae ya meroho. O jetse meroho e fapaneng meleng e makgethe. Ho ne ho le tamati e kgubedu moleng wa pele, lethise e tala moleng wa bobedi, ditapole tse sootho moleng wa boraro, le dihwete tse mmala wa lamunu moleng wa ho qetela.

Kamehla rapolasi Sepamo o ne a hlokomela meroho e holang. O ne a tshella tshimo ebile a e hlaola, a etsa le bonnete ba hore mobu o lokile. Kamora dibeke tse mmalwa, meroho e be e hodile ebile e loketse ho kguwa.

Rapolasi Sepamo a tsoha hoseng, a rwala dieta tsa ho sebetsa a tswela kantle tshimong ya hae ya meroho. A ntsha tamati e kgubedu yoothle moleng wa pele. A ntsha lethise e tala moleng wa bobedi. A ntsha ditapole tse sootho moleng wa boraro. A nto ntsha dihwete moleng wa ho qetela. Di batla di felletse. Sehwete sa ho qetela se ne se hanellsetse mobung.



Rapolasi Sepamo a hula, a hula, a *hula* hape, empa
sehwete sa se sisinyehe.

'Jo, jo, sena ke sehwete se seholo!' a nahana, a
bitsa mosadi wa hae hore a tle ho mo thusa ho
ntsha sehwete mobung.



Rapolasi Sepamo a tshwarella sehweteng. Mosadi wa hae a itshwarella ka thata lethekeng la monna wa hae. Ka bobedi ba hula, ba hula, ba *hula*. Le ha ho le jwalo sehwete sa hana ho tswa mobung.



'Jo, jo, sena ke sehwete se seholo!' ho nahana mosadi wa hae, a bitsa mora wa bona hore a tle ho ba thusa.





Mora a itshwarella ka thata ho mme wa hae, yaba boraro ba bona ba a hula, ba hula, ba *hula*. Le ha ho le jwalo, sehwete sa hana ho tswa mobung.

'Jo, jo, sena ke sehwete se seholo!' ho nahana mora wa bona, a bitsa kolobe ya bona ho tla ba thusa.

Kolobe ya ema ka
maoto a yona a ka
morao ya
itshwarella ho mora.
Kaofela ba hula, ba
hula, ba *hula*. Le ha
ho le jwalo, sehwete
sa hana ho tswa
mobung.

'Jo, jo, sena ke
sehwete se seholo'
ho nahana kolobe,
ya bitsa katse hore e tle ho ba thusa.



Katse ya theohela fatshe
ho tswa leboteng, ya
itshwarella ka thata
ho kolobe. Kaofela ba
hula, ba hula, ba *hula*.
Le ha ho le jwalo,
sehwete sa hana ho
tswa mobung.

'Jo, jo, sena ke
sehwete se seholo'
ho nahana katse.


Kaofela ba ne ba kgathetse ke ho hula.

'Sehwete sena se kekebe sa tswa,' ho bua rapolasi
Sepamo ka maswabi.

Yaba katse e re, 'Ha re lekeng la ho qetela,' a bitsa
tweba hore e tle ho ba thusa.



Yaba tweba e itshwarella ho katse, katse e tshwarellletse ka kolobe, kolobe e tshwarellletse ho mora, mora a tshwarellletse ho mme, ya itshwarellletseng ho rapolasi Sepamo, mme bohle ba hula, ba hula, ba *huuuula...*



Yaba sehwete se a FOTHOHA!

Tweba ya ema ya itlhotalhora. Yaba e ema e otlolohile, ya ntsha mesifa.

‘Le mpitseng nako e nngwe le e nngwe ha le hloka thuso hape,’ e bua e itsamaela ka motlotlo.

Ke mang ya neng a ka nahana hore tweba e nyenyane e ka ntsha sehwete se seholo?



Se qabolang paleng ena ke hore, ke ka thuso ya tweba e nyenyane, e fokolang sehwete se seholo se ileng sa tswa. Thuto ke hore motho e monyenane ya nyatsehang a ka etsa ntho e nang le thuso kapa e molemo ho ba bang.

2B-3 Sehwete se seholo

A. Tekokutlwisiso

Araba dipotso ka dipolelo tse felletseng.

1. Ke mang ya jetseng tshimo ya meroho?
2. O jetse meroho efe?
3. Ho nkile nako e kae hore meroho e hole?
 - a) matsatsi a mmalwa
 - b) dibeke tse mmalwa
 - c) beke e le nngwe
4. Rapolasi Sepamo one a hlokomela polasi ya hae jwang?
5. Hobaneng ha Rapolasi Sepamo a saka a ntsha sehwete sa ho qetela?
 - a) Sehwete se ne se le seholo haholo.
 - b) Rapolasi Sepamo o ne a kgathetse haholo.
 - c) Rapolasi Sepamo o ne a batla sehwete se hole haholo.
6. Ke bo mang bohole ba ileng ba bitswa ho tla thusa ho hula sehwete?
7. Ngola hore dipolelo tsena ke nnete (N) kapa leshano (L).

a) Mosadi wa Rapolasi Sepamo o bitsitse tweba.	
b) Sehwete se ne se hanellsetse fatshe.	
c) Katse e ne tswarelletse ho kolobe.	
d) Rapolasi Sepamo o bitsitse mora wa hae ho tla thusa.	

8. Ke hobaneng ha tweba a ikgohomosa ha kale?

B. Tshebediso ya puo

DBE Sehlopha 3 Buka I: mq 76, 83, II4

DBE Sehlopha 3 Buka 2: mq 28, 43, 76, 77, 8I, I04, I23

- I. Fumana mahlalosi dipolelong tse ka tlase mme o a sehele mola.
2. Ngololla dipolelo tsena ka lekgathe lejwale.

Tweba ya ema ya itlhotlhora.

Yaba e ema e otollohile, ya ntsha mesifa.

‘Le mpitseng nako e nngwe le e nngwe ha le hloka thuso hape,’ ya bua a itsamaela ka motlotlo.

C. Ngodiso


DBE Sehlopha 3 Buka ya I: mq 26, 29

Ngola resepe le ha e kaba ya eng; mohlala; sopo, salate, setjhu, kuku, jwalo jwalo. Feela ha sehwete ele karolo ya bohlokwa ya ditlhokeho.

NA O NE O TSEBA?

- Sehwete se **seholo** lefatsheng ka bophara se ne se le **dimitara tse tshela!**
- Sehwete se **boima haholo** lefatsheng ka bophara se bile **dikilograma tse 8.5!**

4. Ke mang ya thubileng fensetere?



PELE O BALA PALE ENA

Netefatsa hore o utlwisa seo mantswe ana a se bolelang:
kerikete, thuba, bolo ya matsoho, tenese, rakebi, sootho,
moahisane, ikwetlisetsa, kolofo, phahamisitse

Netefatsa hore o tseba ho bala mantswe ana:
dikgalase, tshweu, kitjhining, mmontsha, kgutshwane,
tshingwaneng, jwanng

Ha Mofumahadi Mathaba a fihla lapeng ho tswa mabenkeleng, o ile a makala haholo ho fumana fensetere ya kitjhini ya hae e thubehile. Ho ne ho le dikgalase hohle, le bolo e nyane, e thata, e tshweu e le fatshe ka kitjhining.

'Fensetere e thubehile!' ho kgotsa Mofumahadi Mathaba. 'Ke ilo fumana hore ke mang ya entseng sena!'

Mofumahadi Mathaba o ne a halefile haholo. O ne a kgolwa hore bana ba sa utlweng ba thubile fensetere ya kitjhini ya hae ka bolo ya bona. Ke eo a e ya baahisaneng.



Mofumahadi Mathaba a bona bashemane ba bapala kerikete.

'Ke bolo ya lona e? Le thubile fensetere ya ka?' a botsa a halefile.

Bashemane ba sheba bolo e nyane e tshweu letsohong la Mofumahadi Mathaba. Yaba ba mmontsha bolo ya bona e kgubedu ya kerikete.

'Tjhe bo, mofumahadi! Ha se bolo ya rona eo. Ya rona ke ena. Ha re a thuba fensetere ya hao,' ho araba bashemane.




Mofumahadi Mathaba a tsamaya tsela e kgutshwane. A bona banana ba bapala bolo ya matsoho.

‘Bolo ena e thubile fensetere ya ka. Ke ya lona?’ ho botsa Mofumahadi Mathaba.

Banana ba sheba bolo e nyane e tshweu e letsohong la Mofumahadi Mathaba. Yaba ba mmontsha ya bona e kgolo e mmala wa lamunu.

‘Tjhe, mme! Ha se bolo ya rona eo. Ya rona ke ena. Ha re a thuba fensetere ya hao,’ ho bua banana.



Mofumahadi Mathaba a tswela pele, a ipotsa hore ke bana bafe ba sa utlweng ba thubileng fensetere ya hae.

A bona bana ba ipapalla bolo ya maoto.

‘Ke bolo ya lona e? Le thubile fensetere ya ka?’ ho botsa Mofumahadi Mathaba.

Bana ba sheba bolo e nyane e tshweu letsohong la Mofumahadi Mathaba. Yaba ba mmontsha bolo ya bona e kgolo e botsho le bosweu.

‘Tjhe, mme! Ha se bolo ya rona eo. Ya rona ke ena. Ha re a thuba fensetere ya hao,’ ho bua bana.



Mofumahadi Mathaba a tsamayela holenyana. A ipotsa hape hore ke mang a thubileng fensetere ya hae.

A bona banana ba babedi ba bapala tenese.

'Bolo ena e thubile fensetere ya ka. Ke ya lona?' ho botsa Mofumahadi Mathaba.

Banana ba sheba bolo e nyane e tshweu e letsohong la Mofumahadi Mathaba. Yaba ba mmontsha ya bona e tshehla.

'Tjhe, mme! Ha se bolo ya rona eo. Ya rona ke ena. Ha re a thuba fensetere ya hao,' ho bua banana.



Mofumahadi Mathaba o ne a se a atametse hae hape. O sa ntse a sa tsebe hore ke mang a thubileng fensetere ya hae.

A bona bashemane ba babedi ba bapala rakebi.

‘Ke bolo ya lona e? Le thubile fensetere ya ka?’ ho botsa Mofumahadi Mathaba.

Bashemane ba sheba bolo e nyane e tshweu e letsohong la Mofumahadi Mathaba. Yaba ba mmontsha bolo ya bona e kgolo e sootho.

‘Tjhe, mme! Ha se bolo ya rona eo. Ya rona ke ena. Ha re a thuba fensetere ya hao,’ ho bua bashemane.



Mofumahadi Mathaba a kgutlela hae. A ikutlwa a halefile hore ha a fumana bana ba sa utlweng ba thubileng fensetere ya hae. Ha a theohela tlase ntlong ya hae, a bona moahisane wa hae, Monghadi Mokete, a ikwetlisetsa kolofo tshingwaneng ya hae.

Mofumahadi Mathaba a sheba bolo e nyane e tshweu letsohong la hae. Yaba o sheba bolo e tshwanang le e nyane e tshweu e jwanng ba Monghadi Mokete.

‘Ke bolo ya hao e?’ ho botsa
Mofumahadi Mathaba a phahamisitse lenswe.

‘E!’ ho bua Monghadi
Mokete. ‘Ke bolo ya ka eo.’

‘Jwale e ne e se ngwana ya sa utlweng ya thubileng fensetere ya kitjhini ya ka. E ne e le wena!’ ho bua Mofumahadi Mathaba, ka ho makala ho ho holo.

‘Jo, ntshwarele, Mofumahadi Mathaba! Ke ne ke sa tsebe ka fensetere ya hao,’ ho bolela Monghadi Mokete. ‘Ke tla o rekela fensetere e ntjha. Ebile ke tla tla hona jwale ho o thusa ho hlwekisa.’

Mofumahadi Mathaba o ne a bososela hoba o na le fensetere e ntjha.

Le Monghadi Mokete a tshepisa ho ba sedi ha a ikwetlisetsa kolofo tshimong ya hae!



2B-4 Ke mang a thubileng fensetere?

A. Tekokutlwisiso

Araba dipotso ka dipolelo tse felletseng.

- I. Ke phaposing efe moo Mofh. Mathaba a fumaneng fensetere e thubehile?
2. Mofh. Mathaba o ile a ikutlwa jwang ka fensetere eo?
 - a) O ne a sa kgathale.
 - b) O ne a tenehile ebole a halefile.
 - c) O ne a tshaba.
 - d) Ha ho karabo ho tse ka hodimo.
3. Mofh. Mathaba o ne a nahana hore ke mang ya thubileng fensetere?
4. Bolo e nyane, e thata, e tshweu e ne e le ya papadi efe?
5. Tshwaya dipolelo tse latelang haebe ke nnete (N) kapa leshano (L).

a) Bolo ya maoto le ya matsoho di ya tshwana ebole di ya lekana ka boholo le ka sebopoho.	
b) Bolo ya tenese e nyane ho ya kolofo.	
c) Bolo ya rakebi e sedikadikwe.	
d) O hloka bete, bolo le wikete ho bapala kerikete.	
6. Tshwaya dipolelo tse latelang ho tlaha ho I-3 ho ya ka tatelano ya diketsahalo tsa pale.

a)	O ile a lemoha hore ke bolo ya kolofo ya Mongh. Mokete e thubileng fensetere.	
b)	Bana bohole ba itse ha se bolo ya bona.	
c)	Mofh. Mathaba o ile a tswa ho ya batlisisa hore ke mang ya thubileng fensetere ya hae.	

7. Mongh. Mokete o bontshitse hore o maswabi ka ho etsa eng?

B. Tshebediso ya puo

DBE Sehlopha 3 Buka 2: Iq. 87

- I. Rarabolla mabitso ana a mebala. Ebe o ngola polelo ka lentswe ka leng.

uteshw	dubeugk	uumnal
oshtn	hlaehsts	htooos

DBE Sehlopha 3 Buka 1: mq. 76, 83, 87

DBE Sehlopha 3 Buka 2: mq. 43, 85

2. Ngololla dipolelo tsena ka lekgathe-letlang.

Mofh. Mathaba o tsamaile ka tsela e kgutshwane.

O bone banana ba bapalang bolo ya matsoho.

‘Ke bolo ya lona ee?’ a botsa.

C. Ngodiso

DBE Sehlopha 3 Buka 1: Iq. 13

Kgetha nngwe ya dipapadi tse boletsweng paleng mme o ngole dintlha tse 4-6 ka yona.

Buka 2B

Bophahamo 3 ba dibuka tsa tlhahlamiso tsa Vula Bula tsa ho bala di fana ka monyetla wa ho bala ka bolokolohi le ka potlako ho babadi. Buka ka nngwe e na le dipale tse nne tse fapaneng ho akaretsa le mongolo wa ditshomo. Pale ka nngwe e etelletswe pele ke tlotsontswe le mantswe a 'boima-ho-bala' ao ho lebelletsweng hore barutwana ba a kgone le ho a tseba.

Dibuka tse pedi di lokelwa ho qetwa ka hohle-hohle karolong ka nngwe ya selemo – Karolo 1: Buka 1A le 1B, Karolo 2: Buka 2A le 2B, Karolo 3: Buka 3A le 3B, Karolo 4: Buka 4A le 4B. Para ka nngwe ya dibuka (A le B) di bophahamong bo lekanang, ka baka leo, ha ho na taba hore o bala buka efe pele.



★ BUKA 1A

1. Kausu e nyametseng
2. Sengwathana sa qetello sa kuku
3. Ho hotle ho fana
4. Sephiri

★★ BUKA 2A

1. Bohlaswa bo bokaalo!
2. Ke lebidi la mang le?
3. Boleke-mampatile
4. Ke mang ya phelang mo?

★★★ BUKA 3A

1. Sopo ya majwe
2. Jo, Monghadi Kgabo!
3. Mamlang mmimo
4. Dineo o ya lebenkeleng

★★★★ BUKA 4A

1. Kokonyana le tsie
2. Toropo ya haeso
3. Mmutla le sekolopata
4. Ditsomi tsa diphoofofolo

★ BUKA 1B

1. Ntate o setse le lesa
2. Setshwantsho ka dibopeho
3. O tla etsang nakong e tlang?
4. Sepotolohi

★★ BUKA 2B

1. Thusang!
2. Ebe Palesa o kae?
3. Sehwete se seholo
4. Ke mang ya thubileng fensetere?

★★★★ BUKA 3B

1. Re baka le nkongo
2. Tlhodisano ya moyo le letsatsi
3. Itokisetse leeto
4. Bosiu polasing

★★★★★ BUKA 4B

1. Ditakatso tse tharo
2. Leino le ke la mang?
3. Tau le tweba
4. Afrika Borwa ya rona

(le Bukana ya Dikarabo tsa Mohlala)


Dibuka tse bophahamong bona di na le maqephe a eketsehileng, mongolo o mongata leqepheng, dipolelo tse telele, dipaterone tsa mefuta-futa e fapaneng ya dipolelo tsa bohlokwa, thutapuo tlhaloso semolao le tlotsontswe e ruileng. Ho bala jwale ho se ho itlela fela, ka mafolofolo a maholo le kutlwisiso ho feta ho hlaselha/ho peleta mantswe ha barutwana ba ntse ba atamela ho bala ka boikemelo.

Dibuka tsena di fana ka menyetla ya ho bala ka sehlopha, ka tataiso, ka dipara le ka boikemelo.

SESOTHO



Visit the Vula Bula website
to view or buy all materials
www.vulabula.co.za



ISBN: 978-1-77580-562-5
9 781775 805625